

日期：25/6/2016

發言者：傅煥彬

响正式進入今日主題前，我要對「安老事務委員會」主席林正財醫生、所有出席過 4 月 20 日與長者及各關注團體對談會，而又响 6 月 7 日「安老事務委員會」會議之中，支持通過院舍券報告的委員，作出嚴正譴責！佢哋已完全失信於長者與各夥伴團體！建議林正財連同支持通過報告的委員，集體請辭，承擔責任！

居家安老，不單係長者的意願，亦係評檢一個地方中，長者生活質素的一個指標。香港長者入住院舍比率高達 7%，冠絕全球。可見，香港的安老政策，口講：「居家安老為本，院舍照顧為後援」，現實卻係「本末置地」，過份依賴院舍服務嚟應對人口的老化。

截至今年 5 月尾，共有 6 226 人响「長期護理服務中央輪候冊」，輪候各種資助的社區照顧服務。現時，長者輪候家居清潔，要等三至四年；輪候送飯服務，亦要等七個月以上；就算輪候到送飯的長者，有啲一星期，亦只有三日「有飯落肚」。。。服務供求可謂嚴重失衝！2012-2015，綜合家居照顧服務的「體弱個案」增加近三倍，需求明顯大增，但資助卻並無相應增加。

而家，政府投放於院舍服務的資源，已經係家居照顧服務的 6.7 倍。而家，政府仲打算投放 8 億元搞「院舍券」，向私院買位。審計署已有報告指出，「買位計劃」响過去兩年，平均有 550 個空置位，有些安老院舍的入住率更低於 50%。而院舍券顧問團隊的研究結果亦推算，原來，只有約 10% 長者願意使用院舍券。

只要將呢幾個現象拍埋嚟睇，就知政府做啲幾冇常理，幾咁荒謬！

話「居家安老為主」，但社區照顧服務供應就嚴重落後於需求，已經令政策淪為空談。新增的資源，竟然係撥落院舍服務上，令貧者越貧；更荒謬的是，仲要撥落預計只有 10%長者願意使用的「院舍券」計劃上；而再加倍離譜的是，撥落去無論照顧質素、入住率等表現，都一直差劣的私營買位院舍上面，不單止係資源錯配，仲要係劣幣驅良幣咁「獎勵」差劣。

提供足夠的社區支援服務，落實「居家安老」，唔單止支持長者，讓長者可以按自己的意願，在自己熟悉的社區環境、人際網絡裏終老，活得有質素同尊嚴。而且，仲有預防長者加快衰退的作用：及早介入，能夠令輕度缺損免於跌入中度缺損；中度缺損的又不易變為嚴重缺損，長遠嚟計，社會投入的長期照顧的資源絕對係不增反減。

識計數，梗會咁做！

政府與期浪費 8 億响冇人願用又不得民心的「院舍券」上，不如轉撥 5 億出嚟，即時解決現時所有輪候社區支援服務長者的倒懸之苦，等佢哋得到合適的服務，真正可以「居家安老」。

真為民，梗會咁做！